

Kea le lumelisa Maapara-kobo a matle!

.

Ke ka boikokobetso bo boholo le thabo e khaphats'ehang ke fanang ka molaetsa oa mahlohonolo a Keresemese ho lona Basotho ba batle.

.

Re boetse re fuae monyetla oa ho ananela ts'episo eo Molimo oa rona a e entseng mengoaheng e sa baloeng ea hore "O na le rona- Emmanuel."

.

Ts'episo ena ke seikokotlelo sa rona sa letsatsi le letsatsi, mme Keresemese ke bopaki ba lerato la Molimo ho rona.

.

Ha re ketekeng keresemese ka mehoo ea thabo ho amohela Krete ele Morena le Molopolli.

.

Re kena Keresemeseng ena ka morao ho liketsaholo le liphetoho tse kholo ka hare ho naha.

.

Ha ra tse ling re ka bua ka: likhetho tse akaretsang tsa naha tse lokolohileng, tse re tsoaletseng Paramente ea leshome le 'Muso o mocha oa kopanelo o tsebahalang ka 4x4.

.

Makhotla a thehileng 'Muso eleng Kobotata ea Basotho (ABC), Lekhotla la Kopano ea Sechaba (AD), Mokha oa Sechaba sa Basotho (BNP) le Lekhotla la congress e nchafetseng (RCL), a lumellane ka selekane seo 'moko-tabo oa sona eleng ho aha bongoe ba sechaba sa Basotho etsoe lets'oele le beta poho.

∴

Re ikemiselitse ho sebetsa ka matla ohle ao Molimo a re fileng ona le ho tsosolosa lits'ia tsa mothehi oa sechaba sena, eleng ho bokella Basotho ho ba ngatana ele 'ngoe.

.

Ke lumela hore ruri bohle re aparetsoe ke bolutu ba likarohano tse itlhahisang ka liketso tse soto tseo li bileng li leng thoko le Basotho ba rona.

.

Ho nnile hoa feta leholuotsoana la ho hlasela maqheku, ho koetela, liritlo le ho bolaea bana le basali.

.

Boshulu ba liphoofolo le bona bo ntse bo kekela esita le ho chesa masimo.

.

Re boetse re bone ha polokeho ea sechaba e eba tlokotsing ka mafu a sehloho a hlahileng lipakeng tsa litho tsa ts'ireletso.

.

Liketsahalo tsena li khoehlisa botsitso le ho timetsa phelisano ka khotso.

.

Ke ile ka fihla ka seqo ho amang a malapa a amehileng, Mme maikutlo aka a ile a sisimoha ha bohloko.

.

'Muso o etse hloko hore maqheku ha a sana monate oa ho ja boqheku ba ona.

.

Ba holisa litloholo le litloholoana ka mabaka a fapaneng a bophelo.

.

E le ho baballa litokelo tsa bona le ho ba ts'ireletsa, 'Musu o tlilo teka sets'oants'o sa molao se bitsoang ***Older People Protection Bill*** kapele ho Ntlo ea ketsa molao.

.

Pelo eaka e ke ke ea fola, le maikutlo aka ha ana ho phomola ho fihlela re boetse re hopola hore kaofela re chabana sa khomo.

.

Ke rata ho le tiisetse Basotho ba heso hore 'Musu o litulong o ikemiselitse ho tlosa naha ea Lesotho melomong ea SADC.

.

Puso e ntle ea molao le kabo ea toka li sehlohlolong sa litaba-tabelo tsa 'Musu.

.

Re se re khathile tema ho phethahatsa liqeto tsa SADC ka ho bea babelaelloa polaong ea Lt. General Maaparankoe Mahao kapele ho makhotla a molao har'a tse ling. Ka tsela

e tsòanang, babelaelloa polaong e sehloho ea Lt. General Motsòtsò ekasitana le lipolao tse ling tse etsahetseng ka hare ho naha le bona ba se ba le litlamong ho araba litaba tsena.

.

Maputulo a teng a ho lokisetsa tlhopho bocha (Reforms).

.

Ha ke sa le tabeng ena ea tlhopho bocha, ke lakatsa ho totobatsa hore 'Musu o kene khabong ho batalatsa mabala ele hore mafapha ohle a sechaba a tle a nke karolo.

.

'Musu o hlile o ikakhetse ka setotsoana ho phethahatsa merero ea ntlafatso le paballo ea matlotlo a naha.

.

O mong oa mohato o re seng re o nkile, ke oa ho phatlalatsa ntoa khahlanong le bobulu le bomenemene.

.

Re keke ra phomola ho fihlela mofets'e ona oa bobolu o tsoile ka metso.

.

'Me ke fana ka molaetsa ona ho hatisa polelo ea ka ea la 30 Phato 2017 Ha Mohale, moo ke ileng ka etsa khoeletso ho Balekane ba ka pusong esita le ho Matona a 'Muso oa Motlotlehi hore selemo sena se ke ke sa fela re eso phatlalatse maruo a rona.

.

Ke bua tjena, taba eo e se ele mathuleng a ho phetheloa.

.

Basotho ba heso, ke ntse ke tiisa hore haele bobolu ha bo na tjako pusong ena.

.

Haufi tjena re tsoa ts'oara 'moka (***Anti -Corruption Symposium***) o kopanetsoeng ke mafapha a mararo: Lefapha la toants'o ea bobolu (DCEO), Sepolesa (LMPS) le Lefapha la pokello ea likhafa (LRA) moo ho ileng hoa thakelanoa ka malebela toants'ong ea bobolu.

.

Re mothating oo Paramente e qetang ho ts'ets'etha sehlomathiso holima Tsamaiso ea Litlolo tsa Molao -

Criminal Procedure and Evidence (Amendment) Bill, 2017.

.

Sehlomathiso sena se reretsoe ho matlafatsa molao ona ka ho kenyeletsa ho thibela ho hlatsoa chelete le ho ts'ehetsa bokhukhuni ka lichelete (***Money Laundering and Financing Terrorism***).

.

Re hlile re thibela ka hohle, le ho koala mapatso ao bobolu le bomenemene bo ka ikakhelang tsamaisong ea puso.

.

Bohle re tla hopola hore Lesotho le saletse morao ntlheng ea ho fihlela e meng ea Meoloane ea Ngoaha Kholo (***Millennium Development Goals***). .

Qholotso e kholo ea boemo bona ke hore bo ama bophelo ba 'm'e le masea le ho se sisinyehe hoa maemo a Lesotho mananeng a linaha ha ho methoa sekahla sa HIV le AIDS.

.

'Muso o eme ka matla ho ts'ehetsa mafapha ohle a keneng lets'olong la toants'o ea lefu lena.

.

O mong oa mehato ea mantlha ntlafatsong ea bophelo ke ho thehoa hoa "Lenane le akaretsang la Boipaballo Bophelong Mosebetsing" ***Establishment of a Comprehensive Workplace Primary Health Care Program.***

.

Lenane lena le shebana le bophelo ba basebetsi lifemeng le Makaleng a 'Musu.

.

Mme ts'ehetso e fumaneha ho mafu a kang; HIV le AIDS, TB, lefu la tsoekere, mofets'e oa popelo le lits'ebeletso tsa thero ea malapa.

.

Ke boele ke le hopotse Sechaba sa heso hore khatelo pele e teng toants'ong ea mafu a mang a neng a re romela Afrika Boroa.

.

Mechini e hlatsoang liphieo e se e le teng ka hara naha Sepetleleng sa Motebang Hlotse, Leribe.

- Mme re fokolitse khoholeho ea lichelete tsa Basotho.

- Ha nke ke bonts'e hore joalokaha bophelo ele tokelo ea mantlha, 'Musso o ikemiselitse ho ala letsoho lintlheng tsohle tsa ho fihlela bophelo bo botle.

- Le batho ba nang le bokooa ha ba ea lebaloa, mme molao (***Disability Equity Bill***) o ba ts'ireletsang le ho hlokomela litokelo tsa bona o ntse o sebetsoa.

- Ntlafatso ea moruo, ho fenya bofuma le tlala esita le leqeme la mesebetsi ke liphephetso tse matla tsa 'Musso.

- Le ha ho le joalo, ka ha moketa ho tsosoa o itekang, 'Musso oa Lesotho o amohetse ts'ehetso ea linaha tsa Europe (European Union (EU) ea chelete e 2,6 Million ea li Euro.

- Chelete ena e reretsoe ho ntlafatsa khoebisano lipakeng tsa Lesotho le linaha tse ling.

.

E tla sebelisoa ho aha maano a khoebo.

.

Ke motlotlo ho bolela hore Setsi sa naha sa ntlafatso ea moruo LNDC, se tliho aha lifeme tse leshome le metso e ts'eletseng (16) ha Belo seterekeng sa Botha-Bothe.

.

Lifeme tseo li tla hlahisa mesebetsi ho Basotho ba ka bang likete tse leshome le metso e meraro le makholo a supileng a metso e mehlano (13,750).

.

Athe ha Tikoe teng, karolo ea boraro ea lifeme e se e ntse e tsoelapele moo tebello e leng ho nyolla tlhahiso ea mesebetsi ka likete tse leshome le metso e robeli (18,000).

.

Ke takatso ea 'Musu ho ntlafatsa temo e le mokokotlo oa moruo naheng ea rona.

.

'Musu o se o kene selekaneng le lihoai ele ho rolela marapo a tsamaiso ea temo ea mekotjana (Block farming) ho bona.

.

Re boetse re hlomme setsi sa pokello ea mali sebakeng sa tlhahiso ea liphoofole tse khutsoanyane.

.

Ho ts'elela ka ntle ho naha e se e le pale ea maobane ho lihoai ha ba lokela ho nehela.

.

Rea hlokomela bohle hore mobu oa temo o ntse o qepha.

.

Le lekhulo le fokotseha ka sekhahla.

.

'Muso o ntse o tsoelapele ho loants'a khoholeho ea mobu le ho leka ho bokella metsi.

.

Re khutlisitse mosebetsi oa Fato-fato mabatooeng ohle.

.

Mme lebatooa ka leng le fana ka mosebetsi ho batho ba lekholo le mashome a mahlano (150).

.

Re bile re kentse makoloane a makholo a mabeli le leshome le metso e mene (214) a lithuto tsa mahlale ho tsa tlhaho ho tsoa likolong tse phameng (214 Natural Science graduates) mosebetsing e le basupisi.

.

Khato ena ha e felle tlhahisong ea mesebetsi feela, empa e kenya lerato la naha ho bacha.

.

'Muso o sebetsa ka lepetjo le lecha la ho pharalatsa phepelo ea metsi metseng.

.

E! re hlile re re "***ha ho sa tla ba le motse o tloloang ha ho fanoa ka lits'ebeletso tsa metsi.***"

.

Re atlehile ho fihlisa phepelo ea metsi a hloekileng ho batho ba likete tse mashome a mabeli, makholo a ts'eletseng le metso e mashome a mararo (28,630) metseng e mashome a supileng le metso e robong (79).

.

E re ka ha metsi le tsamaiso ea likhoerekhoere ke li ea thoteng li bapile.

.

Lits'ebeletso tsa matloana tsona li fihletse malapa a makholo a mane le mashome a mane a metso e supileng (447).

.

Basotho ba heso, taemane ea rona e ts'oeu e lokela ho re nyolla moruong.

.

Ka hona re tla una melemo eohle ho eona, joaloka ho fehla motlakase, re noe re be re siele baisane ba rona.

.

Ka khoeli ea Pulungoana, re kene tumellanong le naha ea Botswana le Afrika Boroa ea ho etsa boithuto (Feasibility Study) ka morero oa khaho ea letamo nokeng ea Makhaleng.

.

Boithuto bona ha bo ka atleha, re tla rekisetsa naha ea Botswana metsi. le ha e le mona naha ea Lesotho e tla tsoela pele ho rekisetsa linaha tseo e ahisaneng le tsona metsi, ha e ea sia morao boithukhubetso ba `muso ho bona hore mosotho e mong le e mong o fumana metsi a hloekileng.

.

Ha re aheng naha ea habo rona.

.

Re e bolokeleng meloko e tlang.

.

E sere ra jara thohako le lihlong ha re hetla morao.

.

Ke ka thabo e kholo sechaba sa heso ke le tsebisang hore naha ea Lesotho e boetse e khutletse lethathamong la linaha tse fuoang thuso ea Millenium Challenge Corporation ke naha ea Amerika.

.

Sena se etsahala hobane Lesotho le bonahala le khutletse pusong ea molao e hlomphang molao le litokelo tsa botho.

.

'Muso oa Lesotho oa kopanelo oo ke o eteletseng pele o boetse o entse mosebetsi o moholo ho phethahatseng likhothaletso le liqeto tsa SADC tse tsoetseng ke komisi ea SADC eo e neng e eteletsoe pele ke Mohlomphehi Mphaphi Phumaphi oa Botswana.

.

Re boetse re le naha ea Lesotho re tllilo imona monoana ho ea pele ka ha naha ea Amerika e tla tsoelapele ho re beha ka hare ho linaha tse unang molemo tlasa molao oa khoebisano o bitsoang Africa Growth Opportunity Act (AGOA) e le nts'etso-pele ea moruo le katleho ea bana ba Basotho lifemeng tse rekisang thepa Amerika tlasa selekane sena sa molao sa kholiso ea moruo linaheng tsa habo rona tse tetemang moruong.

.

Ke thetha molaetsa oa ka, ka hore re hopoleng hore nako ena, ke nako ea thabo.

.

Ke nako ea ho fana.

▪

ke nako ea lerato.

▪

Lona bacha tsebang hore lekunutu la ho bona likereseemese tse ngata ke ho hlompha batsoali esita le ho thaba ka boikarabello.

▪

Ke le lakaletsa mahlohonolo le Keresemese e monate.

▪

Molimo o boloke Lesotho le Basotho.

▪

Khotso, Pula, Nala.